

[Back](#)

## KO MAKOU KAHUA

E LIKE me ka malamalama o ka La i ke 'awa'kea loa, pela no ko makou kahua. Aole a makou mau kuko ana no ka poino a pilikia o kekahi; no ka mea, ina he mea hiki ke hooko ia na kokoia iini ana o ko makou makemake, alaila, e nohoalii auanei ka pomaikai a me ka palekana maluna o na mea a pau loa.

E like hoi me ke kalae o na pali hauliuli i aloha nui ia o ko kakou aina; pela no ka waiho laula o ko makou kulana. Aohe a makou mau mea huna, a he ole loa aku hoi na aui ana i o i Hikauhi, a ia nei ae hoi o Kaumanamana.

Aohe a makou poai, aohe puulu, a aohe akoakoa ana o ka auna hookahi no na hawanawana ohumu-humu.

He hookahi wale iho no "KE KOO O HAWAII." Aohe ona koolua, aohe aku i ke kolu, a he ole loa no i ke kauna ma kona kahua kalaimanao ana.

He kuikawa "KE KOO O HAWAII" ma na mea a pau—koe nae kona lili, a me kona makee no Hawaii, kona aina kulaiwi.

Aole oia he makamaka no ka hewa. aole hoi he

launa aku i na pelapela; a he enemi ino loa, nona na kua ana mai i kona lahui koko pono.

A o na hana pono; na mea ku i ka maemae; he mau hoa'loha oiaio ia mau haawina nani; a o ka ilihia o ke aloha aina; ka onipaa o na li'a no ko kakou Hae nani; a me ke akahai malalo o ko kakou Moi—ka Mahiole o KE KOO O HAWAII.

No ka Lahui Hawaii, a me ka poe Aloha io i ka Laui Hawaii makou; a no na pomaikai o ka Lahui Hawaii me kona mau makamaka pono, ko makou hakoko ana a hoea i ka hopena.

O ka mea ua hooiaio ia ua hewa, e ahewa ana no makou me ka nana ole i kona ano, i kona kulana, a i kona kahua. A o ka mea i pono io, nona ko makou leo mahalo.

No Hawaii ko makou paio ana; a o na enemi o Hawaii ko makou mau hoa paio. A iloko o ko makou waele ana a kapae ana ae i na unu a me na eleuo mailoko ae o ka lepo nani o ke Onehanau, aole loa makou e paupauaho ana a hoomaha, a hiki i ka wa e kani ai ka hoe, a ku kilakila ke kaena ana ae—"aohe pohaku i hooi ole ia."

A iloko o ko makou ola ana, ma ka lokomaikai o ka MANA LANI, aole loa e hooihala ia he aui ana o ka manawa, ma na hoomanao ana a me na hooikaika pauaho ole ana, e hooiaio aku, o keia ka io o na io, a o keia wale iho no i na wa a pau e paio hopo ole ai

"KE KOO O HAWAII"

KE eli ia nei he luawai aniani maloko o ka pa o Kimo o Lahaina, ma alanui Emma.

I KA Poakahi i hala iho nei, ua hoomaka ka eli ia ana o ke alanui Emma, e hoomaka ana mai ke alanui Beritania aku a hoea iuka i ke alanui Kula. He eli ana keia i hoomoë ia aku ai na Paipu hao nunui no ka oihana wai. He iwakalua paha a oi ka nui o na paahao e hana nei malaila.

This article has been automatically clipped from the Ke Koo o Hawaii 15 August 1883, organised into a single column, then optimised for display on your computer screen. As a result, it may not look exactly as it did on the original page. The article can be seen in its original form in the [page view](#).